

SEGNORE

Sa notte est pili-cana, ma sa luna
de lughinzu mi faghet in s'andera
cun sa bertula a coddu, cun s'ispera
chi pota semenare custos ranos.
Signore! Nara, ma cantos manzanos
m'has bidu chito in chirca 'e sa fortuna?

O Deus meu, sos sulcos arados,
postos a rughe che sas manos tuas,
pedin perdonu. Saludan sas ruas
cun calandras in chirca 'e semenonzu.
Dami sa manu, nde tenzo bisonzu,
o Signore, de manzanos assolados.

Sole ch'isbozet sas chevas luzanas
daghi lis betto in coro su laore.
Abba lis siet, abba su suore
che latte appena multu in pettu 'e mama,
pro chi crescat e tenzat sa fiama
da tempus morta in mesu sas mattanas.

Ecco! Mi sinno, Signore, e los betto
a manu isparta sos ranos fadados
subra sos sulcos bene tribagliados
cun custas manos che issos abbertas,
raidadas de ispera e sempre tzertas
de incunzas rassas. Signore, t'isetto!

Sos pilos sun biancos, paren nie:
forsis est custa s'ultima fadiga.
Gesù meu illumina ogni ispiga
e damila bundante sa messera,
in modu chi sos ranos in s'aera
cando morzo semene pro a tie!